

Nunarput isumaqatigiissummut ilaatinneqariinngippat ILO-mi isumaqatigiissutip 94-ip akuerineqarnissaa siunertaralugu naalagaaffimmut saaffiginninnissamut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortaq, Naaja Nathanielsen, Inuit Ataqatigiit)

Akissuteqaat

(Inuussutissarsiornermut Aatsitassanullu Naalakkersuisoq)

Aappassaanneerinninneq

Inatsisartut Inuussutissarsiornermut Ataatsimiititaliaani ilaasortat siunnersuutip siullermeerneqareernerani ataatsimiititaliami peqqissaartumik suliarinnissimanerannut qutsavigissavakka.

Naalakkersuisut sinnerlugit maluginiarneqarpoq aappassaanneerinninnissamut isumaliutissiissummi allannguutissatut siunnersuummik saqqummiussisoqartoq, taamaalilluni 2013-imi upernaakkut ataatsimiinnissamut nassuiaammik suliaqartoqartussaassalluni. Nassuiaammi Kalaallit Nunaat ILO-mi isumaqatigiissummi 94-imi pineqartunut ilaanersoq paasinarsisinnegartussaassaaq.

Taamaattoqanngitsoq paasinarsissagaluarpat, Inatsisartut tamatuma kingorna isumaqatigiissut akuerissallugu aalajangissagaluarpata, Naalakkersuisut nassuiaammi aamma aatsitassarsiornermut suliniutinut, ilanngullugit annikitsumik aatsitassarsiornermut taamatullu suliaassanut angisoorsuarnut, ingerlareersunut kiisalu siunissami suliniutaasussanut sunniutaasussat paasinarsisissamaarpat.

Inuussutissarsiornermut Ataatsimiititaliap allannguutissatut siunnersuutaa Naalakkersuisut akuersaarsinnaavaat taamaattumillu akuerineqassasoq inassutigalugu.